

四庫全書

集部

欽定四庫全書

粵西叢載卷二十八

桂林府通判汪森編

藤峽

大藤峽在萬山中盤礴六百餘里以桂平大宣鄉崇姜里為前庭象州東鄉武宣北鄉為後戶而右貴縣之龍山左藤縣之五屯若兩臂然峽以北巢峒不可殫名而西羅淥東紫荆後根姜老鼠白石橫石寺塘桂州厓仙

女關九層樓尤極險阨峽以南山稍廉瘠而牛腸大站
大寺白銀大灣諸村亦皆倚江立寨四寨難通自紫荆
折而稍東為茶山為力山力山尤險自紫荆折而東北
為沙田為林峒迤北折而稍西為羅運羅運之險又倍
力山萬山中狃蠻盤據藤峽之巔立而環眺則遠近數
百里若可舉趾故軍旅所集盱眙而知急則狃竄林中
不可疏捕諺云益有一斗米莫汧藤峽水囊有一陌錢
莫上府江船明洪武間羅淥山狃叛參議湯敬恭死焉

都督楊文與右將軍韓觀分兵追捕破藤峽寨所斬獲
過當然賊依巖險其衆尚繁兵撤之後時出行剽自潯
至武宣江道不通者數十年景泰中猺蠻侯大狗等作
亂嘯聚萬人攻墮郡縣戕執吏民而修仁荔浦平樂力
山諸猺為之嚮應其勢益張守臣惶恐率以甘言噢之
賊愈驕縱天順中詔有捕得大狗者賜千金爵一級竟
不可得久之賊益猖獗七年賊夜入梧州城殺致仕布
政宋欽掠帑金以去時勲臣陳涇內臣朱祥俱聚城中

環戍卒數千部署自守竟無敢尾其後者憲宗即位集
廷臣問計兵部尚書王竑言峽賊稱亂其始皆由守臣
失策以招撫為功長其桀驁譬諸驕子愈惜愈啼非流
血撻之其狂不止因薦參政韓雍可大任上然之乃以
雍為左僉都御史治兵兩廣以都督趙輔和勇為將軍
以太監盧康陳宣監軍成化元年七月雍至全州會陽
峒西延苗賊為梗討滅之戮失機指揮李瑛等四人將
士股栗九月至桂林雍謂修仁荔浦藤峽羽翼當先剪

之乃以永順及兩江土兵十六萬人五路並進窮追至
力山諸賊大敗生擒一千二百餘人斬首七千三百餘
級十一月至潯州分左右軍右軍從武象攻其北左軍
從桂平攻其南雍與輔勇開府於振嶺以督諸軍十二
月朔諸道並發腹背夾攻連破石門道袍屋厦紫荆竹
踏良胸古營牛腸大站等寨賊皆遁入桂州橫石寺塘
九層樓據險立柵以抗師雍麾死士以大斧刊木開道
兩軍齊登發火箭焚其營柵賊大驚潰生擒侯大狗等

七百八十餘人斬首三千二百餘級先是峽中有大藤如斗延亘兩崖諸蠻蟻渡若徒杠然故以名峽至是斬之改斷藤峽捷聞上大喜賞賚有差于是奏設武宣縣東鄉巡檢司以土人李昇為巡檢貴縣北山巡檢司以土人陸善正為副巡檢改周冲巡檢司於勒馬灘以土人廖政為副巡檢靖寧鄉巡檢司于獻得灘以土人任真二為副巡檢大宣鄉巡檢司以零扶寨為副巡檢大黃江巡檢司以陸明貴為副巡檢設武靖州于碧灘以

上隆州知州岑鐸知州事設藤縣五屯千戶所以千戶
李慶掌所事詔如雍議時賊黨尚繁諸司議留重兵輔
不從遂撤兵還是年冬賊黨鄭昂等七百人復夜入潯
州城又攻陷北流容縣民益騷然奏聞廷臣論雍等罔
上罪上宥之四年雍以勦賊功聞仍慮後患上曰雍奏
軍功又慮復聚功可賞也餘寇復聚地方何由寧宜責
雍等督軍滅寇無狃小捷五年雍以憂去賊勢益張因
從僉事陶魯議設總督起雍于家雍故峭直與內臣黃

沁不相能為所訐奏旋致仕去繼雍者漸以姑息弘正
後諸蠻四出如入無人之境而峽以南尤甚橫江禦人
都御史陳金曰諸蠻所嗜者魚鹽耳可妻而啗也乃令
商船渡峽者以大小課魚鹽諸蠻就水許受去江道稍
疏金遂自以為功疏其事請名曰永通峽詔從之未幾
諸蠻緣此征商無算稍不愜即掠殺之必賂乃免尋人
為之語曰昔永通今求通求不獲葬江中誰其作者噫
陳公嘉靖初王守仁總制兩廣檄湖廣土兵誅盧蘇王

受至則蘇受已降無事兵守仁亦欲以奇功自見陽議
撤兵而陰圖藤峽先是各賊聞軍門檄土兵至皆逃匿
深險後聞散遣諸官兵無征剿意皆偃旗息鼓弛不為
備守仁密署部伍四面攻圍賊敗退據險結巢官兵攀
木緣崖仰攻之賊奔渡橫石江溺死無數前後擒斬共
一千餘名自是峽南稍平

通志

嘉靖間武靖州知州岑邦佐不能鎮輯其下諸不率者
且受其賂多曲庇之故峽以北賊復漸猖獗其酋侯勝

海以衆居弩灘為亂指揮潘翰臣過聽土目黃貴韋香言誘殺之勝海弟公丁忿貴香等實利已田廬遂糾黨大噪行殺城下丙申夏五月僉事鄒閱參議孫繼武言于都御史潘旦誅之參將沈希儀沮曰猾賊未易取須春水漲以數千人從武宣順流下撲之乃可不聽遂以千人道潯州擊之賊先遁去斬一病者而還閱與繼武稱賊已斂迹請立堡戍旦從之希儀又言賊未大創兵威不振立堡難守旦又不聽六月堡成令黃貴韋香以

三百兵戍之且詐以取勝海田廬不禁於是諸徭大憤
惠邦佐又陰佑之未幾公丁集衆二千人夜襲堡殺戍
兵二百餘人貴香僅以身免旦聞悔曰果如沈子所料
閱與繼武以啟釁罷位巡按御史諸演疏其事且請討
賊上可其奏乃以兵部侍郎蔡經往代旦戊戌春正月
經集諸司度用兵可幾何時總兵張經對以不過萬人
沈希儀曰非八萬人不可蔡經嫌其太多翁萬達言於
經曰賊為備久矣輕進無功從沈言便會朝廷有事安

南暫寢公丁等益橫時出殺掠潯人苦之是冬萬達以
為言御史鄒堯臣亦贊之經乃會安遠侯柳珣定計以
兵屬萬達監之萬達廉得百戶許雄素通賊狀道之曰
汝當死能擒公丁即貸汝不抵于法雄懼願效自贖萬
達又佯謂公丁仇家誣之耳乃捕擊許訟公丁者數人
責其首禍公丁果遣人自列萬達亦佯許之又令雄假
稱貸為賄公丁喜益信雄會達巡他郡以其事屬參議
田汝成汝成召雄申飭之雄乃給公丁曰潯人久以爾

為口實幸不中于上人今田公新來守何不自訴寇堡
事公丁然之隨雄來見汝成復列冤狀汝成曰聞仇家
誣汝已逮治之矣慰遣之乃密授意城中居民被賊害
者家出歐公丁一市皆譁遊擊并逮入繫獄遣雄諭其
黨曰寇堡事公丁妻罪諸徭須鞠實坐之若等誠謂公
丁冤須罪人得釋之萬一事自公丁當共棄之勿以一
公丁自遭滅亡也諸徭翕謂事由公丁聽諭汝成遂械
公丁詣軍門斬之汝成因言曰首惡既戮賊黨震怖我

兵乘此時加之必成擒矣蔡經曰然遂料兵分左右進時張經議欲仍以兵勦之勿深入又欲舍紫荆等賊數勿擊翁萬達持不可謂勦之必無功且損軍威今諸徭恣肆久不重懲之不足懾其心汝成亦同萬達議蔡經曰峽南亦劇賊但今兵力不能併姑緩之遂格張經議已亥春二月以兵三萬五千為左軍命張經統之以副使翁萬達監軍分六道進經部下指揮王良輔由牛渚灣越武靖攻紫荆姜老鼠諸巢朱昇由三等村渡蓼水

攻石門黃泥嶺諸巢柳溥由白沙灣攻道袍梅嶺諸巢
凌溥由白沙灣攻大昂小梅嶺諸巢周維新由白沙攻
藤冲綠水冲諸巢孫文炳由藤峽攻大坑巢又以兵一
萬六千餘人為右軍命都指揮僉事高乾將之以副使
梁廷振監分四道進乾部下指揮馬文傑由武宣攻碧
灘綠水諸巢王俊由武宣入山攻羅綠上洞戚振攻中
洞吳同章攻下洞以參政林士元及田汝成督餉以副
使蕭晚紀功是月兩軍翼擊之賊大窘遂擁衆奔林洞

而東王良輔以兵擊之中斷賊復西奔遇官軍諸路畢至奮殺賊一千二百餘及其東奔者入羅連山萬達等移兵攻羅連又斬首千餘級賊益窘賊黨有巧黠者號于衆曰往年據險結巢被官兵殲之今日不可再聚於是賊皆漫走山谷間令官兵疲于追逐且持日久糧盡必速退會有言羅連山古所未至者賊遁深入不復窮追云時平安縣有小田羅應古陶古思諸徭亦據險弗靖萬達等又移兵勦之三月班師招賊黨二百餘人峽

南胡姓諸徭歸順者亦千餘人藤峽遂平翁萬達及田
汝成乃共籌處徭七事獻督府一曰編保甲以處新民
二曰立營堡以通江道三曰設督備以控上游四曰改
州治以建屯所五曰清狼田以正疆界六曰處款兵以
慎邊防七曰權商稅以資公費其所陳州治云者緣王
守仁既平斷峽奏宥岑猛予邦佐罪令復武靖州知州
被其害今邦佐部下多離心請改州為武靖千戶所擇
人任之即以三縣良民家之族隸焉議獻蔡經多採請

於上行之捷奏朝廷晉蔡經職一級柳珣加宮保諸將帥守臣等皆賞賚有差

古田

古田縣在桂林西百五十里界於臨桂永福義寧維容融縣間明初有湖北獐者由黔中入柳桂性剽悍其後黨類日滋寢肆侵剽村落之間幾無寧宇弘治五年賊首覃萬賢等據古田縣都御史閔珪調兵討之兵至三厄為賊所襲副總兵馬俊參議馬鉉皆遇害賊益驕居

民轉徙僅存城內外三十餘家省城百里之外皆為賊壘正德十五年賊入近郊殺指揮朱鎧官軍征之不克賊遂攻陷維容縣據西鄉托定洛斗諸村江道多梗嘉靖五年復征之失利殺指揮舒松等自是桂林地方歲遭鈔掠無敢復稱兵矣九年鎮守總兵官張經議立都狼各隘一十三堡募土舍莫崎領兵守之無何經改官土舍崎亦死兵日耗而賊愈披猖三十二年賊入靈州城劫帑金以去四十三年首賊韋銀豹黃朝猛等梯越

省城劫布政司庫銀四萬餘兩參政黎民衷死焉變聞副總兵都司而下各抵罪四十四年賊伏南郊執署靈川縣事照磨曾傳掠其印索贖金始還是秋復越城至布政司及靖邸俱被敵退時島夸內訌兵食交誣都御史吳桂芳度其時未可輕舉遣古田守備卜禎典史廖元持大告諭之上四里獐聽撫下六里獐逆命如故因簡都督俞大猷為廣西總兵官以討賊大猷作討賊二議用兵三議指陳甚悉隆慶初按臣朱炳如以大猷議

具疏聞上俞之廷議征古田非設重臣不可因以殷正
茂為巡撫發內帑金四萬供兵需正茂至以餉事屬之
方伯郭應聘以兵事屬之總兵俞大猷二公夙有成算
遂別剿撫定屯守酌兵期度地形分析條縷繪圖以進
正茂從其議乃會督府李遷疏陳可取狀徵諸路土漢
兵凡十四萬人分為七道大猷度諸兵將集遣把總王
總領募卒分屯牛何三厄以扼要害大猷入縣申以文
告別其順逆傳檄各兵約期並進連硃東山鳳凰大巖

澗水淥里古城數十巢賊勢潰奔合潮水巢據極巔大
猷統諸路兵合擊之賊殊死鬪相持十餘日大猷陽分
兵擊馬浪諸巢而密令死士三十人乘雨夜出賊不意
伏山巔黎明銃發賊衆驚潰馬浪諸巢相繼俱下大猷
復分兵擊碎江金寶頂涼境天井理定南鄉諸賊以五
年三月班師凡擒斬首從賊七千三百有奇餘黨撫定
捷聞陞賞有差先是正茂購豹猛二賊千金犒人黃金
線等誘斬黃朝猛首以獻銀豹計令韋良臺誘犒人狀

貌類已者取其首及豹皮帽佩刀獻之後知其非真檄
知縣唐執中等密捕之生擒銀豹乃械送闕下磔于市
督撫二臣用大猷議奏定東蘭南丹那地三土州官族
韋顯忠羅永山莫羅領常安桐木富祿三鎮土巡檢職
事世守其地立古田守禦千戶所陞古田縣為永寧州
設兵備參將各一員覈諸遺田三萬一千九百餘畝分
給諸兵且耕且守未幾銀豹餘黨韋狼要者以其黨叛
都御史郭應聘檄副使莊國禎購狼要擒之餘黨盡平

于是拓城興學闢荆通道獮人至遣子就學而永寧之

民始獲安枕

通志

陽朔永福

由桂林以南為陽朔縣由桂林以西為永福縣乃府江
右江咽喉也二邑叢岡環亘民夸錯居若陽朔莊頭鬼
子金寶頂諸巢逼近府江永福理定邊山諸堡距古田
尤邇自古田煽亂江道為梗二邑諸巢無不響應者明
嘉靖初賊剽村聚掠帑金陽朔令張士毅百戶曹恩俱

為所害都御史應檟命都指揮鍾坤秀戍其地而僉事
茅坤兵備府江密陳其可討狀應檟從之因部戍土漢
兵搗其穴破鬼子莊頭等一十五巢斬獲四百餘人賊
勢稍戢其後古田賊盆熾隆慶五年撫臣殷正茂檄總
兵俞大猷大征古田賊殲焉遣指揮魯用賢擒斬陽朔
賊三百餘人設金寶大水田二堡分兵守之亡何賊首
廖金濫復嘯聚堡兵單弱不能制萬厯元年古田賊韋
狼要叛廖金濫等乘機應之圍大水田堡殺哨守千戶

楊繼宗邊山諸巢叛者四起據海灣越理定殺傷官兵
尋復與上宋托定賊襲殺雒容尉勢張甚時撫臣郭應
聘檄總兵李錫大征懷遠密召兵萬人分戍近地應聘
謀之憲臣吳一介曰陽永密邇省城輟西師以專事於
此固不可然緩之亦非計今諸賊聞主帥西行必不吾
備度諸戍卒可萬人乘其不意擊之誠便遂會督臣殷
正茂屬一介視師而先事陽朔萬曆二年春一介分諸
道兵會金寶頂大破碎江右隘巖塘涼境廟門徭山諸

巢誅首賊廖金濫廖金盛等俘獲一千二百五十有奇
未幾懷遠賊平一介密遣把總李英諭永福諸巢賊弛
不為備應聘復檄李錫撤懷遠之兵潛攻永福連破海
灣白竹黃累恩位及黃源六斗諸巢所至披靡共俘斬
一千二百四十有奇遂議分兵屯守陽朔縣金寶頂遇
龍翠屏傘山各堡共戍兵三百九十四名永福縣大嶺
陂角堡共屯兵六百四十七名海灣等堡屯兵二百一
十名數賊田一萬一千八百一十畝給兵且耕且守復

設哨船三十隻分番哨護以為常

通志

府江右江

府江上接灘水下達蒼梧為廣右咽喉江道綿亘五百餘里兩岸諸猺獞依憑險阻時時出沒東岸連富川賀縣而北抵恭城西岸連修仁荔浦而南抵永安東則有上中下古折及桂冲石崗黃泥嶺葛家峒諸巢西則有大小黃牛大小桐江及磅碌象磯馬尾冲蓮化汀等巢而朦朧仙廻高天水滄二峒與五指白冒之巢皆為羽

翼江介諸嶺深箐蒙翳白晝嘯聚猱升蛇伏一過餘皇
鈞而掠之急灘之間幾為髑髏蜜其最强者連藤峽倚
溪崗縱橫郡邑明成化初都御史韓雍在藤峽先破修
仁荔浦以剪羽翼共斬獲七千有奇雍既旋師賊復蜂
聚都御史朱英下令撫之立山猺老李公著遣子投款
乞復縣治為編氓時參議謝綬在行間議城立山遂以
其地為永安州而陽朔鄰邑諸崗亦以次就撫矣弘正
間賊首韋萬等圍永安州流劫府江指揮張敞為其害

都御史閔珪陳金後先興師討平其黨嘉靖以來賊復煽亂賀縣黃峒巢倪仲亮鄧良朝等聚衆剽掠僭稱名號都御史張岳集兵破之黨與悉平隆慶初荔浦永安之間反者四起都御史譚綸檄總兵俞大猷畫進剿計諸所籌畫甚悉會綸被召而大猷亦奉檄東征事遂寢逾年三崗賊攻荔浦縣城破古架村兵民被戮者無算西岸仙廻諸賊圍永安州復要執知州掠其印要厚贖始得出當是時道途梗塞城門晝閉永安修荔幾至陸

沉庚午冬古田師興議者謂府江患與古田等宜乘兵
威并及之都御史殷正茂是其議迨師旋則春深水漲
兵不可舉而彪灘龍頭磯諸賊益肆傷人掠貨不可枚
舉事聞兵備副使陳其樂坐貶官是秋正茂遷總督以
方伯郭應聘代巡撫正茂與應聘決計討之乃徵漢土
官兵六萬以六年十月水陸分道而進三峒兵克古西
巖口木魚靛諸巢西岸水兵克太平古冒馬尾彪灘
仙廻諸巢東崖兵克黃峒古榴水滙河冲諸巢賊大敗

追及南源雞籠山復破之凡擒斬首從賊五千一百有
奇俘獲四千餘名口萬歷元年乃議城昭平設縣治復
添設參將開通水陸諸道其各土司官上中峒屬之名
色把總齊凱領田一萬三千八百八十畝有奇下峒屬
之土舍覃文舉領田八千六百六十畝有奇東岸屬之
土族岑仁領田一萬五千二百畝有奇西岸龍頭磯諸
兵領田五千一百九十畝有奇仙廻諸兵領田八千二
百六十畝有奇永安高天古帶諸兵領田二千二百畝

有奇各畫地分界設堡戍守是年冬陽朔碎江賊廖金
濫等起南源殘孽復陰助之襲古西巖口據峰門山灣
應聘發兵援之千戶張世勳衝鋒手刃三賊被創死各
兵斬級二千餘顆奪復峰門應聘復檄參將王瑞統兵
合擊之遂破山灣巢南源賊首周公樓等願自縛詣降
移莫棟兵于山灣分屯諸田據永安扼塞守之復遣總
目覃滿等破榕崗諸巢即以滿領其田上中崗種目楊
九昌等相率投招願輸糧編戶府江悉平

通志

兩岸及三崗皆府江獞北三北五則類皆右江獞也正
德中府江諸獞為粵邊患制置使陳金常請兵擊破之
而北三北五獨征伐未之及及征伐則自是歲始也而
是時右江諸獞生齒益繁前是東岸屬平樂西岸三洞
屬荔浦延袤千有餘里中間巢峒盤絡為獞獞淵藪於
是江上諸偷盜皆倚借為黨援日與府江酋長楊公滿
雷公奉黃公東等奪荔浦坊郭平樂樂山及峰門南源
諸所執永安知州楊惟執已殺指揮胡瀚千戶李可久

周濂軍全朱銓鄧尉二土舍岑丈太學黃文堂及兵民
亡算而遷江之北三來賓之北五尤最甚歲歲與東歐
西里及三都五都諸賊相倚附馬多人勁俗號為剗馬
賊常陳兵走東粵略三水清遠諸縣還入南寧平南武
宣來賓藤貴劫府庫已略來賓所千戶黃元舉家產殺
土吏黃勝及其子四人兵七十餘人已殺明經諸生王
朝經周松李茂姜集四人自是之後白晝皆蒲伏道左
奪道左諸過使行李李李副使戴僉事多受其禍居頃之

南四逋逃宵韋明甫及其子十餘人亡抵右江謀為報復計乃據武宣諸生朱如銀揚揚騎馬騾千餘來於是焚大盧等七村攻博學等二十一村會舍人張剛佐史周于義遇行間諸獍執而僂之奪其所持牒阻置郵置郵無敢晝夜行道上多不得以文書相往來是時兩江守巡使劉穩沈子木李文績告于撫巡使郭應聘制置使殷正茂後先以其狀請是歲隆慶壬申冬也乃以李錫為大將軍而屬參政胡直為督漕使按察副使金柱

鄭茂夏道南為監軍使龔大器劉廷舉為紀功使期十月十五日十道並出而是時諸土吏韋文明以東蘭部兵至趙邦興以龍英部兵至岑紹勳以泗城部兵至莫之厚以南丹部兵至岑瑾以歸順部兵至黃思以江州部兵至黃瑚以向武部兵至太錄以田州部兵至岑清寶以武靖部兵至黃有瀚以忠州部兵至黃允章以上林部兵至王吳黃正以思恩部兵至馮紀以都康部兵至韋龍以鎮安部兵至羅世璟以那地部兵至鄧承印

彭大武以永順部兵至許世興以上映部兵至岑壽松以湖潤部兵至黃一貫以遷隆部兵至黃鎮以安陸部兵至於是王世科提東蘭泗城永順安隆湖潤兵攻古西巖口破之斬首捕擄二百有四級復攻平滿青龍破之生得八人斬首五十四級餘黨奔入笋山古造阻山為巢泗城東蘭兵搏戰斬首三百五十三級已疏捕諸山斬首八十四級餘黨復走南源雞籠山巢追逐斬首二百二十二級還攻西南青殿木魚諸巢斬楊錢甫楊

公滿楊朝猛楊扶豺莫扶金莫扶楊等首三百六十一
級錢鳳翔提田州忠州龍英武靖遷龍兵攻東岸黃洞
古摺糯峒破之生得黃公護蘇公韋斬唐義婁唐會婁
袁婁沈婁首一百一十三級攻黃泥嶺水涯洞生得黃
公送斬首一百二十六級疏捕何冲莫家冲斬首二百
一十級餘黨奔入倒流苦竹蒲巖諸山追亡斬首四百
一十六級王承恩提田州兵擊龍巖破之斬首二百二
十二級奪獲被鹵二人復提思恩鎮安都康兵擊西岸

馬尾及勞碌黃牛諸山破之斬周添郎鄧琶婆盤滿婆
盤賤婆鄧郎等首一百二十一級餘黨奔入仙廻高天
古帶諸山疏捕仙廻西岸生得四人斬首一百五十二
級守備康仁生得一人斬首二百八十四級進攻高天
泗城兵先登斬首一百二十六級我兵創五人餘黨悉
遁追亡逐北至古河中斬黃公東等首七十一級復疏
捕西岸斬首三百一十三級董龍提歸順南丹那北上
林兵擊太平古冒馬尾破之斬雷公奉王公社等首一

百四十一級奪被鹵一人復攻唐冲彪灘破之斬首一
百一十七級田義凌文明提向武江州奉議上映兵擊
兩岸破之斬鄧婁等首百一十七級復攻南源雞籠仙
廻高天斬首捕擄一百四十一級是歲萬厯元年春正
月也大率斬首凡四千六百六十七級俘獲凡四百四
十八人奪獲被鹵凡三人牛馬凡二百三十三頭器械
凡二百一十有九前是給事中梁問益上書請征兩江
諸酋欲相度先後機宜以行於是右江備兵使沈子木

移指揮使于碧蕭紳令奉檄入北三北五宣朝廷威德
趨歸降會峒老韋法真等同原鹵來賓遷江民蒙演蒙
葛眉等具盟誓詣備兵使所願歸所奪田輸賦請以漢
官式臨之當事者具報可於是蒙演等得自新而李良
臣李純唐鍊先後為巡按御史具得其狀大會撫巡使
郭應聘制置使殷正茂並奏于上下本兵議尚書方逢
時俄覆奏詔賜殷正茂金五十兩表裏二進郭應聘秩
一等廕一子入太學李錫秩二等皆予金三十兩表裏

亦如之已撫巡使及制置使大會布政使楊成參政胡
直李鳳按察副使高察僉事霍與瑕江圻為善後六策
以上上皆可之前是荔浦之峰門南源修仁之麗壁永
安之古眉諸邏司為諸獍所奪頃議改土巡檢其官目
必推擇有才武者給冠帶管事滿三載稱職如真始與
襲世世勿絕乃於東岸水涯復麗壁市而與廣運足灘
為一軍軍二千人備平西嶺鐵匠坡仙家冲於西岸仙
廻復古眉而與高天冲口為一軍軍一千六百人備陸

內六章於龍頭磯為一軍軍一千人屬漢官備馬尾田
沖黃牛及三峒於上峒古西復峰門為一軍軍一千六
百人備羊厄峯門盧仙大喃兼視中崗於下崗東練復
南源為一軍軍一千人備大宅東瓦皆屯田月食餉人
三錢而歲以衛萬戶或千夫長百夫長一人兼視邏司
事稱職亦令得世守土是時左江以潯梧參將一人募
兵一千人而邏司及桂平諸武吏悉以屬之歲時參將
得提兵巡徼昭平荔浦之間殷殷不絕也于是西岸通

五道道自昭平明源洞以達仙廻又自仙廻達古蘇直
走永安又自藤灣達馬尾象磯自象磯達田冲直走平
樂又自龍頭磯達大猺上下兩洞而東岸自昭平達水
滌自水滌達平西邏山及十三屯自平西邏山達平樂
又自深冲達桃嶺由此兩岸皆孔道矣初府江自平樂
至梧州五百餘里而遠中間皆無郡縣在唐宋時有龍
平思勒馬江沙亭諸縣今皆猺獞窟穴矣乃于平樂之
昭平馬江建縣以昭平古龍平地遂割富川之二五都

賀縣之招賢鄉下半里上半里及仙廻土司大率賦糧三千六百八十餘石大司農請于上於是賜縣名曰昭平屬平樂

贊曰昭平故古龍平地也以余所聞故縣印尚封府庫今幸縣其地此非陛下威武所變化能至是乎然而大將軍金規石畫亦不可不謂至壯兩岸三崗皆改復土司以漢兵七千人戍守之皆令其受法漢吏志念蓋深矣哉曩從府江至梧州五百里無縣今冠蓋相望於道

唯恐輶車之行遲也

瞿九思萬
歷武功錄

雒容柳城永寧

雒容縣治故在白龍巖明天順間燬于賊邑民奔米峒
居之後即山麓甃為垣湫隘幽陰甚弗稱距古田常安
鎮僅隔一水正德末古田賊攻破之嘉靖初稍修復城
中僅茅屋百間募卒殘民居之而官吏皆僑居柳郡遙
示約束隆慶初大舉古田師集兵糧于雒容掌縣事知
州余涵始創公宇時古田賊多遁洛斗及附縣諸村當

事者議并加兵有老人莫止等素通賊密以情告賊懼
投止等賂涵為請軍門得逋誅先是賊妻子未畜半匿
城中止等乘兵威脇之邀厚利及兵退求賞弗獲始與
縣民為讎無何涵轉官知縣邵廷臣來代知賊反側議
復縣城于白龍巖避之守巡官以後鉅費艱議久未決
廷臣旋以憂去諸賊糾永寧遺孽韋狼要等時時噪譟
而柳城上油峒與諸巢相聯絡為之淵藪萬厯元年舉
懷遠師都御史郭應聘慮雄容城守單弱召上林縣兵

一百名協守賊稍戢

通志

韋狼要永寧酋長韋朝義洛容酋長也先是獾人黃銀成與狼要有隙相讎殺而常安邏司欲窮治之於是狼要椎牛齊合永福陽朔碎江諸獾攻圍鳳凰理定大水田射千戶章繼宗宗中流矢死碎江諸獾走荔浦山灣狼要走右江皆招致獾人會指揮徐民瞻兵捕服道左執狼要獲輿謁兵備使莊國禎餘黨馳還乃請于制置使殷正茂臺御史郭應聘御史唐鍊即以羽檄徵田州

向武都康諸士兵凡七千餘人屬裨將王瑞王承恩汪可大凌文明康仁往而以參政使吳一介監之是日即提兵馳茶溪鏖戰王瑞斬廖金鑑廖金盞韋銀花韋狼花韋狼相莫伯雍等首凡三百一十九級汪可大生得黃朝鮮斬莫鑑從莫良行等首凡三百有七級王承恩斬首捕擄凡一百八十有三級張世勳疾力戰劍斬二人勳亦有金盞死凌文明斬首捕擄凡一百三十四級康仁斬首九十五級大率斬首一千三百三十八級俘

獲八十一人牛馬四十頭器械九十有五繪畫黃衣一襲時癸酉秋八月也先是月正上元托定洛斗與古底上油諸獍獍洛容令邵廷臣以歸養去尉謝漳行縣事於是獍人韋朝義等夜半直擣漳所鼓噪竟殺漳漳死奪其印符而去是夜指揮使朱昌胤與土巡檢韋顯忠並提兵願與諸獍決戰昌胤斬首二十三級顯忠斬首三十一級我兵傷一十三人諸獍皆逐走而裨將文斌張汝能胡德忠追亡逐北生獲韋朝義覃三官等凡八

十三人得縣印一顆于是守巡使莊國禎沈子木李文
績皆移都御史而與總戎李錫決筴往征矣而是時王
瑞為一軍軍永寧以往古底上宋諸巢崇文凌文明康
仁為一軍軍永福以往理定海灣諸巢亦孔昭為一軍
軍洛容托定洛斗諸巢楊照為一軍軍柳城以往上油
諸巢而錫以中營居理定江期二月二十六日四道並
出於是永寧軍擊古底上宋大蠱天心塘諸巢先登破
之生獲覃狼印斬覃金鉢覃金倒覃百長覃銀郎等首

凡八百七十二級永福軍擊思任狼家諸巢卻敵先登
破之生獲羅仁周王朝傍斬莫扶頂覃應黨羅文朝羅
公盤覃朝俸等首九百七十二級洛容軍擊托定洛斗
理伏川巖諸巢先登破之斬首捕擄陶狼金陶狼漢羅
道章陶良陶定陶金總羅道印羅顯揚陶朝漢等四百
八十二級柳城軍擊上油上良里廂諸巢卻敵破之斬
首五百一十二級大率斬首凡二千八百三十八級俘
獲凡二百二十一人奪獲被鹵凡一人牛凡五十五頭

器械凡二百六十有二書籍凡五本關防凡一顆項之制置使具捷急使使者請于上事下大司馬譚綸於是先賜郭應聘金三十兩表裏二李錫金二十兩表裏一自是之後御史李采菲訪誅訥永寧洛容後先斬首捕擄凡四千一百五十二級上有詔遷殷正茂為兵部尚書兼副都御史郭應聘為兵部右侍郎兼僉都御史李錫陞秩三級李文績等陞秩一級金錢皆有差先是御史唐鍊奏土吏泗州則岑紹勲歸順則岑瑾鎮安則韋


農永順則彭永年掇凡二百以上南丹則莫之厚東蘭
則韋應龍那地則羅謙範保靖則彭養正掇凡一百以
上下雷則許宗廕龍州則趙應龍英州則趙邦興上峽
峒則峒長許世興忠州則黃有朝思明則黃恩隆永順
則彭大武鄭承印上林則黃允章安隆則黃榮下石西
則閉文經五土則覃文顯黃正黃誠視觀則官族韋寬
掇凡一百四十四級上幸賜岑紹勲等金二十兩莫之
厚等金十五兩許宗廕等金十兩正茂乃上書謝爵賞

以為此陛下之靈社稷之福也臣等何敢以為功上嘉
賚如初其後大屋諸村殘獍黃朝貴黃金鼎復齊合融
之陽老村柳城之上油邨酋長覃金磊等號為萬餘人
聲欲大入富福鎮而王世科等引兵擊破之斬黃金鼎
及從賊首凡五十八級綜其實大率不下七百人也始
洛容在萬山中而迤北一帶依山無城郭令皆寓郡城
以為治而縣之為縣廢棄幾六十餘年矣舊令余涵常
請遷於白龍巖費亡慮四千六百有六兩甚矣其講於

保治之規也

贊曰余聞洛容城垣僅六丈不下二十戶而縣尉謝漳以單騎巡徼萬山中可謂壯士及韋酋發難竟受金夸而死死于封疆誠封疆之臣哉然洛容永寧之捷幾至五千大將軍功豈不偉與於戲永寧得陞為州不二三載乃復為獍苦今何如矣

萬厯武功錄



粵西叢載卷二十八

欽定四庫全書

集部

粵西叢載卷

千九
辛

詳校官庶吉士_臣瑚圖禮

主事銜_臣徐以坤覆勘

總校官庶吉士_臣朱齡

校對官助教_臣羅萬選

謄錄監生_臣劉家瑛

欽定四庫全書

粵西叢載卷二十九

桂林府通判汪森編

懷遠

懷遠在柳州之北與湖貴靖黎接壤徭獞於徇蟠據最繁而號黑徭者尤獷悍宋崇寧中古州蠻納土號懷遠軍尋改平州尋復廢明初將軍吳良征蠻降古州峒因割融縣金雞鄉益之列四鎮置縣治于潯江融江之匯

顧地形崎嶇弗稱附郭左右徭徠環居之三甲民遠處諸徭外民無固志正統初賊首韋潮振等聚黨千餘茶諸邑聚報聞上命撫之耳成化後侵入融縣板江諸村據之當事者置弗問嘉靖間知府江滿乘馬平征師之便自將征之失利賊勢益張遂破縣治知縣布恒懷印出匿自是城郭為墟而三甲遺民僅延喘息縣官惟僑

居府城

通志

懷遠柳州屬邑也居右江上游旁近楚之靖綏貴筑之

黎平為諸徭所竊據懷遠故淪沒數十年隆慶初征古田
章大捷諸徭皆驚服于是懷遠令馬希武使楊官朱萬世
召徭老加仲才等曉諭以禍福欲城縣仲才曰幸甚敢不
如明府約久之令果往徭獐羣輩數十百人皆郊迎令望
見令至大驩皆叩頭不自意得復見漢官儀誠願編入版
圖歲時輸賦役如編氓今請至唯令所左右希武猶豫久
弗決仲才等乃指天日埋石歃血以盟希武既到縣具如
諸徭所請以撫處文牒移兩臺因郵置以聞上幸報可于

是分守使李文績分巡使沈子木使柳州推官高日化洛容知縣邵廷臣行縣而希武及經歷余冕典史陸錦鄭鵬徐仕科邏司鄧元先已治茅為廬然後建城郭衙舍倉獄也前是希武與稿黃大地太平河裏諸徭約約建城縣請以三十金擊牛酒犒諸徭頃城工過半諸徭請牛酒希武堅弗與諸徭以為令食言皆大拂其意而去當是時諸徭常以易米往來城下城下諸役夫曰以女等先時擊破城今乃累我衆殊甚我衆心厲兵秣馬待一日城成盡殲夷厥衆而後吾等始愉

快可知也稿黃諸徭皆疑畏有畔去意又希武新政尚嚴急諸戍堡兵縣盡罷斥之反趨召隆起兵兵至躬自騎馬走城上旦莫鳴金鼓銃砲如雷諸徭聞皆愈自疑以為曩役夫告我今果然由此縣中口語藉藉多有欲先縣而發者矣希武不知諸徭故乃提鑿鼓督責諸役夫益急諸役夫相與議曰建城實欲利賴我奈何徒為我貽禍乎亡何希武不知諸徭故乃提鑿鼓方響呼夾道而馳會徭中一童子至望見令直前左右呼之曰走童子弗走令大怒疆榜服

之加筭數十遂死前是繩坡頭板江諸獠已痛令入骨髓至是大會稿黃大地太平河裏獠人乃謀曰即城未就尚笞殺我子男如此果如役夫言城成殺我無疑計莫如先殺令期旦日舉事為謀者所覺微以告令令弗信榜笞謀者旦日諸獠乃帥數百人由北城入諸役夫皆欲走令呵止之獠人乃以鳴鏑射令若尉而馬希武及余冕陸錦鄭鵬徐仕科鄧元皆中流矢元竟死希武失印傷兵夫龍喜等一十七人時隆慶壬申冬十月也制置使殷正茂以書

請上有詔罷李大績等俸令待罪於是大將軍李錫急
使參將王世科為左將軍軍稿黃大地參將錢鳳翔為
右將軍軍太平河裏畢會長安鎮並出亡何稿黃太平
乃與丹陽鎮猪肉田塞蕉花諸徭亡慮數千人治舳艫
數百艘大入石棋傘頭諸村村落鄉兵鏖戰斬首一十
九級生獲五人諸徭皆止舍平栗洲鄉兵翼而圍之擊
舟舟湛沈溺死者亡算獲舟三十艘長安鎮邏使周大
有以其捷來告我兵乃鼓行至板江約自東崖直擣懷

遠會大雨雪自人日至二月中連旬弗開為按兵不敢
動朱萬世得縣印來獻是時徭人皆來自貴筑及黃土
絞團於洞與三甲殘民鐵甲勁弩皆其長技我兵水行
則逆流而上陸行則羊腸鳥道甚崎嶇迴遠不可度所
過道上又皆徭巢常自言阿徭得守險漢烏奈我何制
置使詞知諸徭獨畏楚永順鈎刀手及狼兵乃以羽檄
三道移所在撫巡使於楚則趙賢於浙則方弘靜於貴
則蔡大徵鈎刀手三千人烏銃手五千人狼兵十萬人

以二月計之費以五萬餘已大會撫巡使郭應聘御史
唐鍊屬布政使楊成按察使高察參政使吳一介李鳳
鄭茂副使劉廷舉徐作參議高則益僉事夏道南江圻
參將王世科都護許文及總戎李錫議先使使者招徠
白果諸徭黃上諸徭青棋大梅諸徭令歸降以防連朋
之患然後擊太平河裏四港牙寨稿黃大地吳江濔諸
村當是時東岸則板江楊梅西岸則坡頭河潺皆助徭
為虐而古田上宋酋長韋狼要亦與其弟韋狼金奔右

江五都招致諸劇賊為黨援時癸酉冬盡矣於是章程
兵由柳州出永保兵由靖州入至則分為七軍以錢鳳
翔軍坡頭王世科軍縣北楊照軍縣南亦孔昭軍板江
魯國賢軍湖兵而以李錫為大將軍營居中兼督大榕
江軍聽潭二水軍而以副使沈子木監之莊國禎紀之
而知府許嶽熊煥彭文質陳子佐張寔侯國治同知王
任蕭騰鳳陳所學通判蕭時中朱成武蘇繼文推官高
日化知州張樞同知王恕判堵禪知縣黃褒王一岳李

邦仁趙宜吳鎮陳宗堯余光祐楊春煦皆聽調度是時
辰沅備兵使史嗣元備綏寧而貴州撫巡使躬馳永從
期十二月朔四日皆進至板江會諸徭以木石塞江灘
羣聚黨千餘舳艫百餘艘計欲拒我兵望見我兵水陸
並攻皆股栗盡反踵走我兵遂拔木毀石而入大破之
連拔丹陽蕉花中團田寨古立洛果火燒合水諸巢斬
酋長榮才富吳金田等首百二十五級餘黨數千人皆
奔入丹竹楓木間據層巒阻絕澗以為險殊死戰我兵

攻巢先登斬首四百二十二級殺賊棄旂鼓越大稜嶺而遁復聚天鵝嶺我兵追亡逐北直擣天鵝嶺至七團四寨腮江巴峒諸巢生得酋長隆扶羊斬王伯牛爺等四百四十三人奪獲風紀輯覽諸書及鶴頂榆木黑花帶皮印囊諸物復進兵攻大藍公和唐朝山諸巢而稿黃大地及板江田寨衆聚邵鄧大山固已數千餘矣我兵卻敵斬于弟保等首一千有五級餘黨復奔入寨列重柵堅壁而守矢石如雨我兵乘勝先登乘風縱火焚

木柵斬榮田師等首千二百九十級主簿李材提撫猺

兵助戰斬首五十九級

通志云諸兵追逸賊望一大巢長亘數里崖壁峭絕以合圍大

木列為重柵詢之撫猺云上猺龍七寨也諸猺稱曰猺官猺王急則入窺其地官兵攻之賊殊死鬪矢石如雨下有數婦裸體揚箕擲牛羊犬首為厭勝術官兵砍柵直上四面舉火烟焰蔽天賊大敗潰梟斬賊級及燒死者無算獲懷遠官錫牌及演禽決戰妖書自癸酉十二月至甲戌春二月大

率斬首捕擄凡三千三百四十四級俘獲男婦凡二百六十三人奪獲牛凡四十九頭舟凡八十六艘盔甲凡一百九十有六槍刀牌弩諸器凡一千七十有奇事聞

上賜殷正茂金三十兩紵絲二表裏遷郭應耳秩一級
賜聘及李錫趙賢金二十兩紵絲一表裏方弘靜蔡天
金十五兩諸土吏思明則黃承祖東蘭則韋應龍南丹
則莫之厚那地則羅忠輔泗城則岑紹勲歸順則岑瑾
思明則黃恩隆江州則黃恩龍英州則趙邦興龍州則
趙英忠州則黃有瀚武靖則岑靖寶上林則黃允章下
石西則閉文經永順則鄧承印彭大武彭永年上峽峒
則許世興下雷峒則許宗蔭湖潤則岑壽松鎮安則章

農思恩則覃文顯徐浩韋顯威黃正黃承祖潘承紀王
觀韋寬遷隆則黃一理安隆則黃榮保靖則彭養正鎮
溪則張寬於是上有詔賜岑紹勲等金二十兩莫之厚
等金十五兩許宗蔭等金十兩始尚書譚綸請曰上幸
賜諸土吏金錢甚厚諸土吏戴天子恩德如覆載自今
有如不可知一日以羽檄徵兵務以梟騎應聲而至乃
足徵報稱十一二不則請得以柱後惠文彈治之諸土
吏曰敢不如約于是東岸北岸屬內三甲河裏太平南

寨屬外三甲四港東濠波浪塘堀屬武洛洞人猛團七
團屬韋單二狼人桐木火燒洛溪合水及三門洛果屬
上猺籠郡鄧勇尾屬中猺籠稿黃大地屬下猺籠坡頭
田寨及板江河潺大田蘆屬浪溪種人邊田板壁屬寶
江種人板江猪肉屬魚樓種人河潺蕉花屬背江種人
大田蘆及下猺籠皆互相約束矣前是諸當路議兵防
欲改萬石宜良冊陽為土巡司已欲加守備一人已又
欲於永福加海灣堡屯兵二百人古鉢堡屯兵三百人

毛峒堡屯兵三百人於臨桂加傘山堡屯兵二百人於陽朔及大水并田金寶頂為一堡屯土兵五百人而里定羊骨遇龍翠屏諸堡皆加兵為壘且耕且守故事東蘭南丹那地歲出土兵三千人更番戍省會頃自古田發難當事者議改思恩鎮安田州而思恩諸州曰我故有梧州之戍已甚奈何將軍又戍我乎自是之後鎮安及湖潤為一年思恩及田州江州上腴下雷為一年年出兵三千人以四年戍桂林而泗城及歸順都康為一

年向武奉議及上林為一年思明及思明州遷隆峒為一年龍英及忠州為一年年出兵四十人以五年戍梧州皆以撫巡使郭應聘請也

贊曰余觀猺獞長技不過缺甲勁弩已耳至無所畏畏狼兵及鈎刀手而殷司馬以為猶鼠之畏猫也然哉語曰非我族類其心必異夫狼兵及鈎刀手皆故屬土吏然則土吏奉約束而後吾制猺獞始有兵耳粵乎粵乎而猺獞常什六七此誠當震讟之令加畏奈何常倚重

此屬為哉

萬曆武功錄

是時議改縣治于板江四年徭復叛戕把總李材于坡頭堡尋毀板江堡縣竟弗克成自是縣官仍寓融城若寄公然六年賊復攻長安鎮官兵敗之賊舟覆溺死者無數萬曆十七年知縣蘇朝陽入箐峒諭羣蠻卜丹陽而遷邑焉城郭學校煥然一新韋藩木捷稗販經屬自是而諸徭翕然嚮化矣

通志

岑溪

梧州兩粵之會也其地崇岡盤谷延袤相屬往往為犵
獠所盤踞而岑溪尤甚岑溪之西北有上七山下七山
介于蒼梧藤縣間有平田黎峒白板孔密等三十七巢
東南為六十三山有孔亮陀田桑園古欖魚修白磔等
百餘巢與粵東羅旁相聯絡賊據峻嶺高可摩天山徑
周遭僅容厠足叢林修樹環數百里無日色賊上下山
阪若走丸我兵乘之竟不能尾其後賊生長山谷如虎
踞穴客兵至不耐其水土瘴輒侵之賊據山上伏樹中

望我兵如數一二我兵惟一小徑可行賊旁伏藥弩中人立斃我兵望之輒次且而却益虺之弗摧而任其跳梁叫號也久矣弘治年來四征不克嘉靖初七山賊唐宗欽等煽亂都御史陶諧集官兵討之時居民多為徭耳目者師出無功賊滋益橫三十二年都御史應檣密部署諸卒假以征西為名乃潛入七山賊棄巢奔我師困之賊多殪死者遂全師返七山諸酋自是少戢而六十三山賊其桀驁猶故賊謂官有萬兵我有萬山兵來我去兵去我還蓋二

百年來未有擣其虛者時粵東羅旁賊方熾橫江截人而岑溪潘積善容縣劉德厚等俱為羽翼益鴟張無忌萬厯初都御史凌雲翼舉兵征羅旁盡平其地聲言移兵岑溪潘積善懼自縛詣軍門乞降而德厚亦投容縣願約束諸獍民為編戶乃議設參將府于大峒統兵千餘名參將以秋冬二季駐節練兵覈北科鎮田三千六百餘畝招獍人頭目韋月統耕兵三百名耕守其地設連城北科七山六雲諸鎮分兵列營統以指揮千百戶自是賊人帖服時募兵皆粵東勁

卒頗驕恣領兵偏裨與縣官爭道參將王德懋不能約束各兵遂入縣治掠帑金以去復越左江大肆屠戮軍門撫之戮其首惡九人由是議罷客兵用土著曩時健卒屏除幾盡岑人故脆弱不習擊刺諸應募者多田家子所守營壘距其家數百武而近官按籍稽之人人入伍馬首稍遠即宿私家壘則星列兵則鳥散有一二在行間者不過衣短衣持鈍刃與無兵等耳獐目韋月所招耕兵初猶精悍後漸以耗散耜耨策笠不能滿三百

人而老弱半之時參將往來大崗練諸材官賊尚少戢
二十一年有參將吳顯忠者足跡不入岑溪而時腴削
諸鎮官鎮官索諸偏裨偏裨索諸部伍上下交為市而
兵制益蕩然矣二十三年冬賊瞰我無備日出剽奪鎮
官稍以法繩之擒其首惡戮於市諸酋遂結約圖報復
而直大祿粵東亡命浪賊數百潛入七山誘諸徭以
厚利謂岑溪可旦暮下即帑金如取之寄耳諸徭頗善
其策又有乾廂村撞人素悍奪黎峒沙田徭人欲甘心

焉顧謂諸浪賊吾欲釋憾於乾廂若其為計浪賊曰此
易易耳遂于二十四年正月假作材官諸役持官文書
以迎參戎為名種人不虞也借之宿且飲食之諸浪賊
四鼓起內外夾攻乾廂一村俱被屠戮無遁者徭人遂
決意反日侵諸村自廣邑民一日四五驚縣官警報旦
夕交馳督撫二臣因發梧戍卒數百連夜入岑而檄總
兵童元鎮董兵事元鎮故為梧參將守岑溪者二載諸
酋長若潘積善陳三峯韋月皆庇其宇下願効犬馬力

因命諸酋撫猺人諭以禍福六十三山諸猺初猶徘徊
觀望至是多受約束間攜男婦入謁縣官勞以酒肉無
不頓顙者亡何參將某馳檄之岑而掌丈者以勦北科
為詞北科猺方就韋月聽招見檄大怒曰官家誑我遂
與七山孔亮山賊合謀攻殺韋月燬大峒參將府其勢
益以猖獗督臣陳大科撫臣戴燿僉謂此賊宜速交母
令滋蔓遂調兩粵兵八千餘人以副總兵孟宗文陳璘
參將吳廣李鳳守備黃鍾分署諸部而以童元鎮總之

諸所籌畫參政洪有復副使林廷陞實後先焉復命總
兵侯國弼調土兵可萬人為後勁撫臣即移鎮蒼梧申
號令懸賞格人人競奮矣時募兵先集賊見兵至伐大
木塞道環布箠簽我兵陽督諸役開道而陰從小徑登
孔亮山賊據高疾鬪弩矢如雨兵士將前而却參將吳
廣即斬一卒以徇諸兵大奮火銃齊發賊扶傷走諸將
分道追之賊迎戰復敗初賊謂六十三山王師所不加
不虞今日之涉其地也遂人人震恐望風而潰追至魚

修白牒復大破之賊潛遁于車灘我兵乘之賊溺死者
無算亡何侯國弼統土司兵繼至窮搜諸穴賊殲焉計
前後斬賊首從共一千一百有奇俘獲四百有奇遂班
師還撫其餘黨八百餘人因從兵道張文耀議更將募
卒伐木通道而會參將李鳳以疾歸以參將吳廣代之
諸善後籌畫俱次第舉矣

紫溪集

北三譚公柄河塘韋宋武諸僮

譚公柄北三酋長韋宋武河塘酋長也而北三別號剗

馬賊其技長於治弩弩頗毒發必能中傷人每一出常
百十為羣自弑土吏黃勝以來歲歲為邊患苦戊寅夏
公柄與韋三層韋三丈等常以二千餘人出公鳳山龜
鼈塘而韋宋武亦傍江結壘當是時義寧有韋總管韋
千里之獍永寧有黃河平黃明虎之獍永福有廖勝朗
良快之獍羣輩為姦阻山公行殺商人李回及新民黃
銀花執良獍莫東玉等郡縣皆儆戒道路不通先是萬
厯初恩及長官司被獍常退輿地可三里七何唏咳寨

寨酋長藍公潺等欲執土吏黃如金盡奪其土司如金乃以其狀告于恩吉參將王瑞頃柳慶參將倪仲化遷來指揮孫世寶永寧百戶陳維翰皆後先請于臺御史吳文華於是軍書移制置使凌雲翼大會於東蘭那地面冊之間是日即以羽檄屬分守使吳善分巡使陳俊徵永順白山諸土州州賦兵三百人及狼兵營堡諸兵皆馳大巖上平橫山啼咳等巢期諸軍聚河塘啼咳為營一時至者四面前是臺御史郭應聘常欲請大兵往

擊之五載弗克公柄等以故益慄桀自河塘啼咳之兵
一出恐公柄等不得旦莫偷生也亡何北三諸酋願以
所占據遷江所屯及被鹵諸生口獻將軍遂班師

贊曰北三之戰余僅得之臺御史所題知耳其後竟以
自縛得免北三故接北五八寨可通東歐皂嶺橫亘恐
失今不治猺獞益熾它日足為遷來所害患宜此間耶
語曰非其種者鋤而去之甚哉柳慶之間如當味乎其

言也

萬歷武功錄

十寨

十寨舊稱八寨曰思吉曰周安曰古卯曰古蓬曰古鉢
曰都者曰羅墨曰剝丁後益以龍哈唏咳為十其地東
連柳州三都皂嶺北四諸峒西連東蘭等州及彝
江諸峒南連思恩及賓州上林銅盤淥毛諸峒北
連慶遠忻城東歐八仙諸峒周環五百里故遷江
八所屯及上林二里民地賊據日久寨各十餘人
扼踞險要鷙悍難制明成化初參將馬義討之

無功殺同行軍士謬以捷聞正德間思田多故諸蠻益恣嘉靖初盧蘇王受叛以尚書王守仁計撫蘇受令以功贖蘇受亦欲立功自効遂潛師分道擣八寨諸巢兵破石門賊始驚覺遂大奔潰官兵乘勝追躡共斬獲一千九百餘級因議移衛置寨未及行而守仁以病歸不數年猖獗如故

通志

思吉周安落洪古邛羅墨古鉢古憑都者及龍哈唏咳

右江號為十寨隆慶中制置使殷正茂擊破古田即以
檄趨八寨歸降得貸死於是寨老樊公懸韋公良石公
慶藍公咯羅公印黃公遨等踵軍門上謁自言八寨與
龍哈唏咳號稱十寨十寨之村固一百二十有八環村
而居者亡慮二千一百二十餘家而右江兵備使鄭一
龍及參將王世科賓州守吳梟武緣令楊大韶以為十
寨既請為氓當以十家為率賦米一石凡二百一十六
石七斗亦得輸銀米石伍錢當徵銀一百有八兩三錢

五分它若火電差銀戶一錢凡二百二十有奇然後村
立一甲長寨立一峒老為徵賦計而以思吉周安落紅
古外龍哈立一州屬向武黃九疇羅墨古鉢古憑都者
哱咳立一州屬那馬黃賜皆為土州守已移思恩守備
於周安堡有成議而布政使以為於法不便當立二長
官長官各提兵一千人而有琴水橋荒田及南丹衛屯
田民田皆歸我可賦糧以佐兵餉不足則取三里魚峯
巷賢堡兵餉三百五十餘兩不足則取樊公懸等約戶

每加三錢五分歲以為常皆給兵可召三里十冬三潮
峒老即度田因開立墟場以通思恩慶遠武賓諸道然
後建社學子男請以義勇蕭紳為千夫長黃昌陸雲騰
為百夫長姑與冠帶俟三年稱職為真而備兵使霍與
瑕以為八寨當陞為州而使黃暘提兵六百人守之而
龍哈哖咳可立土巡司請徵安定兵二百人付黃昌備
龍哈徵興龍兵二百人付韋富備哖咳即以守備移于
鳳化城黃村俾與黃暘並得調度二邏使其後制置使

竟請八寨為長官司而以兵八千人屬黃暘為長官而黃昌韋富皆給冠帶為土舍亦各引兵二百人食二寨如約也居六七年十寨復聚黨萬餘人據人田產白晝大都之中剽人而奪之金甚至攻城略庫戕官殃民十寨之衆六七載之間乍降乍叛非復曩時樊公懸等所約也於是制置使劉堯誨及臺御史張任請弓矢得往正其罪然後與諸裨將約約不至三月費凡七萬餘兩而寨酋之頭欲盡懸戲下七何斬首捕擄凡一萬六千

九百有奇奪獲器仗三千有二百牛馬二百三十九頭
果以三月得捷也故事北邊斬首捕擄七十以上為下
捷九十五以上為中捷一百一十以上為大捷

闕

倍三之寨賊倍六之反賊倍十之於是大司馬方逢時
從制置使請乃咨儀部使大鴻臚引使者至御前宣讀
捷音事下大宗伯乃于五月十三日常朝期宣捷如禮
是日大鴻臚致詞行五拜三叩頭禮已遣公徐文壁侯
李言恭伯陳景行祭告南北郊及太廟而是時制置使

殷正茂及御史顧鈴布政使吳椿盧仲佃按察使林澄
源皆去官久例不叙御史胡宥乃訪誅納以聞而征蠻
將軍王尚文及姜忻李一廸侯國治彭大質陳俊陳應
春林舜道歐陽模彭富王天爵周舜岳劉世賞皆有功
於是守令得叙者於郡守則李遇春鄭國臣於同知則
梁直鄭應齡周易王一岳李應魁魏士吳於通判則李
佳徵江龍黃杞李尚桂朱會極胡中於司理則孫承南
蔣上欽顧志邦劉正賓於州守則饒敬承漆大昌楊茂

先陳一定趙崇鳳於知縣則丘鍾勞守謙黃約李三樂
功次之上乃賜劉堯誨金四十兩表裏四張任王尚文
金三十兩表裏二姜忻侯國治等金十五兩李應祥等
金丹等王天爵等金十兩自是之後論土吏功行賞於
田州則岑大祿那地則羅瑞謙下雷則許宗廕安定則
潘承紀江州則黃河漢龍英則趙邦定歸順則岑瑾遷
龍則黃兆翁泗州則岑紹勲東蘭則韋文韜當第居上
等而鎮安則岑奇鳳思明則黃承祖萬承則許國璉上

林則黃允章上映則許宗惠都康則馮紀白山則王觀
那馬則黃如金永順則鄧得揚彭大武忠州則黃有瀚
興隆則韋觀思明則黃恩龍南丹則莫之厚忻城則莫
鎮威當第居中等湖潤則岑壽松下旺則韋顯威古零
則覃文顯當第居三等而向武則黃瑚羅陽則黃璫當
第居四等安隆則岑洪舊城則黃正武靖則岑清寶歸
德則黃朝果化則趙祖銘都陽則黃受山定羅則徐權
皆與黃瑚等法當論如律於是上賜岑大祿等金二十

兩莫鎮威等金十兩岑洪等下臺御史逮問明年春臺御史張任卒于官而御史王宗載以請天子幸哀憐任以死勤事予之祭葬是歲也以八寨分為三鎮各建一城而以東蘭州韋應鯤韋顯能及田州黃馮充為土巡檢得比古田例留兵一千人附土吏許宗蔭許尚惠岑大祿仍屬賓州而以思恩參將統之先是三里屬上林之循業撫安古城久為賊巢今改為龍哈唏咳矣其下增建二堡而請自楊渡水為界盡墾為屯給南丹衛通

道慶遠賓州而使思恩三里皆聯絡不絕巍然一大觀也

贊曰余聞之都御史李公遷曰八寨之民淳朴太甚不患其心之不誠而患吾所以處之不得其理不患土官之力不能制患其制之太過或不堪命而為它時之憂豈其然乎且八寨自嘉靖中新建伯討平以來至樊公懸歸降能幾何時而旋有已卯之役哉十寨庶幾無它腸與建堡開屯久矣為塞上畫無窮之策也

萬歷武功錄

柳州馬平

柳州西北界于楚黔諸蠻而桂之古田平之修仁連岡
扼險互相盤結明永樂初柳州馬平縣五都賊梁公竦
等作亂都督韓觀剿之斬首萬餘級馬平十八里之民
盡被屠戮其存者三不得一後耕民日少沃壤荒蕪往
往募種人耕種種日繁而剽掠滋甚宣德間雒容縣蠻
賊出劫屯聚指揮王綸縱兵殺害良民山雲以聞上命
逮治其後山雲上征剿柳州蠻賊首功上謂尚書張本

曰蠻性好亂自取死亡可憎亦可憫也其令雲善撫之
弘正以後古田多梗馬平雒容諸獍聚黨響應魚峰賊
周鑒復相煽為亂柳州太守劉璉率兵數百禦賊賊敗
走璉追之賊偵知援兵不繼還戰獲璉剖腹實草焚其
尸督臣不以實聞自是賊益肆官兵莫之誰何馬平田
土蠶食幾盡縣擁空籍耳嘉靖間賊首韋金田等占據
水陸二路村落為茶者不可數計二十四年都御史張
岳總兵陳圭征之調漢土兵七萬分三哨並進攻雷巖

同艮平田落滿都博等巢穴之遂圍魚窩集魚窩石壁
削立拔地高數千丈從來用兵莫能一勝諸將以為難
岳曰魚窩不破即他寨破無為也遂移鎮柳州督諸將
攻愈力賊急呼他寨賊與併守山四周傾仄難置足賊
晝夜守不撤山頂繩懸礮石兵一臨寨賊斷繩礮石亂
下如雨岳陽令諸將撤圍寨中賊稍稍有逃者岳復移
鎮柳城召授諸將方略作久困計諸將猶請罷兵岳度
諸將不足與計事間召副總兵程監令選勇敢士備親

軍監選三千餘人請所用岳曰吾欲有膽力不懼死者
任吾指揮死且優卹其家于是願從者七十人岳曰足
矣遂以七十人屬之監令劫寨監有難色岳顧左右酌
酒灑地誓必滅賊復出袖中紙示之曰此吾二疏草也
寨破薦爾首功不破則爾養寇為首罪惟君所擇耳監
泣曰監且為公死矣時賊巢苦乏水臭穢觸人每日數
人共水一瓶涓滴必爭一日五賊當守險逕者爭寨中
曰熱甚可多予水眾持不肯大誼五賊怒而去比夜堅

卧不巡警而鑒將七十人至寨下未敢發也先令五死
士持刀學猿猱攀木而上五賊守險逕者熟睡弗覺五
死士斬之代為巡警七十人者冒險夜登聲誼寨中賊
併力出戰而山下兵復乘之山頂賊架木橋通往來兵
至頂賊蹙毀橋兵臨橋火炮矢刃迅激交發呼聲震山
谷間而賊中主計老嫗年八十矣急呼衆速自焚毋為
官兵所魚肉也於是魚窩遂破而高挽同銀馬鞍諸巢
俱破前後俘斬四十餘級時有議乘勝兵窮其黨類者

岳曰自秋徂夏兵老矣武固不可黷也因命夷諸險巢
戢其餘黨由是馬平之三都四都來賓之北五凡諸渠
魁皆自挾軍門願為編民

紫溪集

韋王朋馬平獍也先是大將軍擊破賊巢因建營堡使
土舍韋志隆提兵往屯其地以故王朋視堡兵為仇讎
常率東歐大產諸酋阻山橫行要挾營堡而分守使彭
應時備兵使周浩使千總往撫竟殺之時壬午秋也縣
官度韋王朋至為阻撓得亡恙遂肆刼略白晝行邨落

如入無人之境有司莫能擒于是總戎王尚文李應祥
參將金丹請于制置使劉堯誨臺御史郭應聘得提千
總張茂功吳國勲等兵及忻城莫鎮威下雷峒許宗蔭
諸土兵攻巢先登斬首凡六百六十二級俘獲凡四百
三十七人牛凡五十三頭馬凡一十三匹器械凡二百
四十有奇奪獲被擄凡三人而是時柳州守則陳大猷
同知則漆文昌倅則宋和慶慶遠守則高文炳皆以功
著初馬平徭獍常請鄉士大夫之託以佃丁莊戶浮沉

閭閻而鄉士大夫亦親入寨峒遂至交錢財課租責息
出入縣庭始未嘗不相善而後漸自相戕賊也而大司
馬梁夢龍請著為令令監門各立門籍嚴加譏察所與
徭獍通而因而致富者即以其財產沒官詔可之由此
獍人大凜凜也

贊曰西粵之有徭獍譬之家室之有鼠也非不欲一鼓
而殲滅之不勝其殲滅也韋王朋故遺孽幾為魚肉然
欲致其死則死矣何知有今日乎以我冠裳斌斌至聞

與此曹課租責息嗟夫養虎自貽患戒之哉戒之哉

萬歷

武功錄

高江諸猺

高江諸猺皆出自大小桐江及大小亮村也旁近緒頭
三妹平峒諸巢假羊大窰諸猺往來互相為奸四方通
逃皆亡抵其間隆慶中大將軍常提兵往正其罪桴鼓
不鳴今上之戊寅也酋長盤宗明犯邊邊吏執而僇之
於社亡何諸猺悉欲報邊吏乃乘風縱火燒大結堡明

年直指使舉士于鄉鄉書因郵置以進行至小輩灘諸
猺劫略之母遺居二三年復大入猶巷堡殺我兵一人
我兵轉鬪殺一人傷二人頃復犯小結灘奪商鹽而會
平樂兵變諸猺亦窺隙而起遂擁衆走貓兒堡潛伏西
岸大桐江逢千戶李夢龍百戶劉卿及廣運堡哨兵廖
異四等舟而商人朱子隆等亦多附卿而行者諸猺乃
鑿官舟略舟中行李卿與諸行人並跳走其下灘底水
湍多失脚赴水溺死者九人夢龍見為劉卿死睚眦盡

裂急與哨兵殊死戰諸徭盡貫弓執矢射我軍我軍中
流矢而死者九人于是昭平守備陳邦佐與貓兒堡哨
官陳珊移于府江備兵使葉朝暘右江備兵使郭桀即
請臺御史吳善先以會城標兵二百人馳高江因使總
兵呼良朋即以羽檄徵許尚惠岑紹勲岑瑾許應珪韋
文韜岑奇鳳黃如金徐國黃正羅謙端韋觀莫崖諸土
吏兵四面而至於參將白玉游擊重元鎮邵敵先登
生獲李蘭堡等一百有九人俘獲七百三十九人斬首

一千一十一級奪獲牛馬亡算我兵傷一百一十有五
人亡一十人亡何制置使吳文華及臺御史奏聞而屬
御史黃鍾訪誅納具如所請上從本兵張學顏議有詔
遷吳善秩一等及呼良朋它賜金皆二十兩表裏二之
是時葉朝暘以兵變當左遷待罪行間詔從副觀察使
秩調而郭棐金十兩徐時可等金五兩而吳文華久蒙
上賞矣諸臣皆北鄉叩頭此皆陛下之靈社稷之福臣
等何力之有乃辱九重爵賞下頒也是時乙酉閏九月

也先是把總陳賢往歸順汪天寵往九司及那馬定羅徵土兵索取折度鞍馬諸類亡厭而都護孫世寶提泗城東蘭兵備三木卯諸村因使東蘭兵託名搜賊刼殺一空於是御史黃鍾劾奏上以孫世寶等下御史逮問凡調兵進兵需索諸積弊皆繩以文法至嚴乃自是歲始也

贊曰黃御史所奏徵土兵之弊良是余聞土兵自初調之後續有二調三調以至四五調者始以為過在諸土

吏奉行不謹耳及土兵至則有徵五百而遞增為七八百者有徵一千而遞增至一千五六百者名為報效而後乃今而知諸土吏毋過也我偏裨諸將軍有如得充調兵之後多提幫手棍徒以行既至索土吏及行索驛騎延引歲月徒欲充滿囊橐安在其為大兵計乎語曰烏鈔求飽吞肌骨豈謂此耶

萬歷武功錄

粵西叢載卷二十九

欽定四庫全書

粵西叢載卷三十

桂林府通判汪森編

懷集嚴秀珠諸猺

嚴秀珠懷集獠人也而與車廷惠諸酋雄據一十五巢
環四面二百餘里自上世為諸郡邑所患苦正德中大
將軍提兵往征之歸降幸亡恙自是之後盤互連歲生
齒益繁而懷集有金鵝之酋松栢之酋龍壙之酋埴七

之酋賀縣有大灣之酋磨刀之酋深埔之酋佛篋之酋
企塢之酋黃沙之酋開建有水細之酋白蓮之酋往往
欲相扇而起公行郡邑顧未隙耳隆慶中常與流賊陳
龍洲略郡縣殺百戶朱裳今上即位以來慄桀尤甚與
懷集民高鴈梁輩金接高庫黃遂梁玄珠謝生等數十
餘人殺把總羅定朝與賀縣判賊蘇應曉金敬李用生
略樟木寨梅花峒殺金宅數人久之秀珠失遺耕牛然
禍所從來矣乃佯為報怨擊鮮椎牛聚黨數百人遂走

開建封川之間略寧峒蔡村牛二十五頭殺九人擄七
人是時村落之間皆畏秀珠甚東西遯逃走而獨西村
寨鳴銃砲如雷擊死三人傷一人於是開建令范調元
蒼梧令李白英懷集令林春茂賀縣令李介福移蒼梧
守巡使管勲來經濟急使懷集尉陳經濟提南龍鑼鼓
營兵追逐生得鄺安梁三羅黎保三人斬首四級項之
守巡使並請于制置使吳善乃以羽檄馳兩廣總戎戚
繼光呼良朋即徵東粵標兵及羅定東西山泗城都康

歸順肇慶北岸大峒諸兵而東粵守巡使陸萬鍾鄭人
遶王泮朱東光既引兵雲翔而至分為五道而以參將
戴應麟為將軍出伏虎營王如澄為將軍山蘭峒山魏
宗瀚姜虎為將軍出石牛營守備楊壽甫為將軍出仇
峒游擊沈茂為將軍出會珠營而屬王泮來經濟監之
而肇慶守鄭一麟梧州守林喬楠平樂守鄭時章及同
知鄒通平鄭應麟日夜趨肇慶倅朱士貴梧州司理莊
敦義轉輸軍中饋餉不絕皆期二月初二日並舉於是

伏虎軍擊金雞松栢埔七諸巢先登破之斬嚴秀珠韋
胡通等首六十一級俘獲八人奪獲牛四十四頭器械
三十有奇蘭峒軍擊古城上下諸巢卻敵破之斬區世
奇韋亞養等首五十四級俘獲一十二人奪獲牛四十
三頭奪獲被擄一人器仗一十有九石牛軍擊深埔佛
萎龐埔諸巢卻敵先登破之斬劉高滿劉福昌首三十
九級俘獲一十四人奪獲牛四十頭馬二十匹會珠軍
擊水細白蓮黃沙龍塘諸巢破之捕擄徐廷穩鄧時華

等二十四人斬首三十二級俘獲二十二人奪獲牛二十頭器仗二十有奇仇峒軍擊破大灣磨刀企礪諸巢破之斬歐福正陶伯正等首九級俘獲六人奪獲牛十頭器仗一十有奇諸偷悉犇青水尾佛姜鐵帽諸山于是戴應麟進據金鷲巢為營旦日帥所部追亡逐北至青水尾鏖戰生獲陳朝瑞等一十人斬首六十三級俘獲一十二人奪獲牛七頭馬一騎器仗一十有九復追逐至大竹山斬蘇運進等首一十級俘獲一十五人奪

獲牛六頭復追亡至更鼓山斬鄧仕石朝行等首一十七級俘獲九人奪獲牛八頭蘭哨軍追古城賊至三岳大鐵帽斬鄭明端覃朝龍等首六十五級俘獲五人奪獲牛二頭器仗二十石牛軍運入佛姜斬劉貴安等首一百一十七級俘獲一十三人奪獲牛三頭馬一騎器仗八十復攻大青山石坂嶺斬首三十二級俘獲七人馬一騎復追古婆大山斬首三十三級俘獲四人奪獲器仗一十有奇復追亡至譚鞏石巖生得盧亞添吳朝

富等三人斬首三級俘獲四人會珠軍追亡至飯甌埆
青水尾生得車廷惠一人斬首一十四級復攻龍塘瓦
斬李先富等首一十九級復追亡至塘龍黃沙尾生得
龍秀等五人斬首四級俘獲二人奪獲器仗一十有奇
仇峒軍追亡至大灣山斬陳惟德孔四弟等首三十六
級俘獲一十二人奪獲牛七頭還搜古城斬首二十二
級搜沙埆企礪生得梁石滿二人斬首六級俘獲五人
奪獲牛二頭復疏捕企礪山生得劉國全等二人斬一

級石牛軍逐北至都逢程家山生得李結成劉福成等
一十四人斬首三十九級奪獲馬一匹器仗一十有奇
銀五十兩而是時開建尉楊萬珠鏖南令山生得李廷
業等九人俘獲九人復捕伏鶴膝嶺斬首二級富川吏
目王言鏖戰石卧龍鵬諸灘生得劉朝珠等八人斬首
一級俘獲五人懷集尉陳經濟鏖戰燕嶺生得吳朝海
姚榮才等一十六人俘獲九人奪獲牛二十七頭還戰
南陀大岳諸山生得周子傑等二十二入俘獲三十人

奪獲牛五頭時乙酉二月盡也於是銅鐘牛欄丁口約
四百人皆踵懷集縣庭中叩頭吾等誠願充戍卒守險
而羊橋八崗千餘人願為撫民相引赴賀縣語亦如之
曰天子聖神諸公卿算無遺筭我輩如孤雛腐鼠耳而
與其阻山障間長嬰大罪旦莫引領待斧鉞孰與為治
民得提桴鼓立軍門以備宿衛之選寧不媿快乎後大
司馬梁夢龍以臺御史捷覆奏上幸賜大司馬以下爵
賞金錢有差始叛賊李用庄久閔匿羊橋崗至是崗老

送奉到邊請死罪甚至執兵戎以衛我界上險隘而懷
集牛欄銅鍾上下帥故反側悍甚今亦歸降而大將軍
梟斬以示威武者不過銅鑼后山十數人而已

贊曰金鷺之捷豈天欲殲除此屬耶何其滅之速也余
數其師旋之期猶不至三旬而百年之逋寇蕩滌殆盡
府江十寨皆犁其庭掃其穴而郡縣之其為金鷺諸巢
善後策不少槩見何法曰多算勝少算不勝也夫犛獍
難猝滅漸拔巢而郡縣之此多算者也

萬歷武功錄

土吏黃拱聖

黃拱聖恩隆男也先是黃武崇於國初歸降給府州印信各一顆而是時長子黃忽都授官郡太守次子黃均授授官州太守都傳至承祖授傳至泰泰正室生四子長恩詔次恩錫次恩隆次恩祐庶室生三子長恩重次恩承次恩祿而會詔錫後先久物故隆當行州事於是詔妻趙為妻錫妻黃為次妻黃乃承祖姊也而趙生三子長拱極次拱宸次拱闕黃生二子長拱廷次拱聖

而州印固封貯太平庫庚辰中隆從征諸徭有功得給
印以嗣隆尤寵黃慮拱廷拱聖實庶出勢不得嗣於是
謀於承祖因欲載領印券內異時拱廷得嗣也隆既嗣
即奪祖所侵黎龍白鵬當蓬那橫那煉諸村田土弗得
興動干戈旦莫相仇殺也亡何隆罹霜露之病以為承
祖於我隙益深設百歲後是屬豈為我子孫計久遠乎
乃大書遺命取族目恩祐黃冕及州民舉結因以印并
皆附拱極而隆遂溘然捐館舍矣時丙戌五月也承祖

聞隆死是日擁衆擊拱極欲還隆所奪村寨而目兵盡走上搏戰殺三人相當拱極懼有後禍乃請于臺御史吳善御史黃鍾願使它官填撫其民于是以指揮使楊桂芳往亡何拱廷倉卒逢霧露病在喉門承祖乃使醫人阮仕偉視脉而母黃及婢金蓮的臺供藥餌竟不可起死矣酋目鄭錦及州民張國用左驗無它腸然拱極禍所從來矣旦日祖乃急使使者歸賄歸賻囑黃佯言拱廷飲酖死而內人黃受黃師明及周佛黃仲周明果

如黃氏指大言拱極毒死拱廷於法不當嗣我郡太守
意以為有如鄉老能以拱聖嗣歸黎龍諸田兩相和好
它日陞賞如約不然我以兵虔劉乃衆也乃送奉黃受
黃仲及周佛周明百金為治兵費於是約鄧寧覃彭郭
佳等以六月十九日並詣州前而覃彭來自東門郭佳
來自西北門皆持鬪器入拱極欲遂走恩承止勿走拱
極乃携妻許及弟婦趙走入後衛而王朋鬪乃負拱聖
出走覃彭即與黃蓋甘京林武等追亡執拱極取印會

楊指揮至拱極佯以為在楊指揮所農二乃去楊指揮衣裸身實無印驅逐出門走已鄧鎬鄭鏞于柱上索印不可得復解拱極衣疏索得印乃屬黃受附拱聖蓋因欲致拱極死乃立券使黃師明與張國用貨三十金給鄧寧鄧寧遂欲劒斬極極曰吾無罪誠欲我死我欲自縊死寧乃以弓絃與極極竟自縊死死矣妻趙負屍而哭極哀寧及陸戴復殺趙趙有幼孩二人呂燦張國用即捐棄于水溺死寧佯告拱宸拱闕吾貸女死送女往

龍州拱關果亡抵於寧家寧因請於拱聖吾復奪二虎
子索重賞拱聖與之金十兩是夜夜半即與黃師明等
殺宸與闕詰朝農義藏等以板盛拱極及母屍以篋縛
拱宸及拱關屍燒毀置江中而陸戴甘京黃蓋等遂二
十一日拜拱聖為州太守而拱聖竟擁大蓋策駟馬入
州也既到官管事即論功行賞乃陞土兵鄧寧為總印
農義藏為哨首頭目黃蓋甘京陸戴林武為總萬戶內
人黃師明為總哨甲首黃受長監門覃彭羅團郭佳亦

如之羅斥頭目黃恩隆及羅絃甘師鄭錦等而罰族目黃恩祐金十兩恩承金二十兩恩祿及黃冕金五兩田土皆沒入州而是時承祖恐官族有它腸乃使黃學夔約族衆至廟歃血以盟保拱聖居官亡恙於是以拱極妻許拱宸妻趙繫獄聖知二氏皆有孕當欲錮鐙懸兩手欲因而墮棄之弗就已殺萬戶孫伍傳首郡中居二三日南寧太平移左江備兵使因請于制置使吳善下備兵使逮捕拱聖奪印封府庫而御史蔡系周檄亦如

之乃屬南樂太平二郡守行州俱得其狀會許舉一子
因名黃世延是時許外家請得世延以歸承祖不許於
是制置使及御史皆檄太平郡守趙釋許竟如所請也
頃之逮捕拱聖及鄧二農臺王引標等對簿而龍州江
州龍英太平全茗恩城諸州及下當上映諸土崗皆為
左驗拱聖既虛服有死罪乃奉印封太平府庫而備兵
使議以拱極幼男黃世延嗣而以許氏為官母官弟太
平諸生黃承恩及頭目鄭鏞輔之俟異日世延長大給

印先是南太二守議以州改隸漢府而黃冕等以為本
州賦稅故輸南寧願隸南寧也於是臺御史劉繼文御
史蔡系周當拱聖以下罪請梟斬寬假黃承祖而以思
明去南寧可四百餘里去太平可百而欲以屬太平也
事聞下大司馬王一鶚如議以請上皆從之於是梟斬
拱聖等思明市革黃承祖衣冠而以思明隸太平也

贊曰語有之天道好還絲毫不差豈不信哉恩隆兩妻
丘嫂欲傳嗣於庶而乃嗣拱極者此非情也卒之拱聖

以庶子弒兄僂及宗枝幾盡誠天所以報施恩隆而顧
第太慘耳許氏孤兒得免虎口終為極後偉矣由此觀
之立嫡以長亦天道也豈徒國憲哉

萬歷武功錄

山賊楊秀

楊秀武宣大盜也庚辰夏縣令饒養浩病伏在床褥楊
秀與劉子連乃窺公庭之隙夜半帥十餘人執炬鳴銃
走西南城殺監門賈扶毒直擣縣庫庫掾蔣邦取弗能
敵遂逃於是諸偷持斧擊破後衛門執養浩略柴薪俸

資因趨養浩並詣庫奪庫金六百四十五兩銅錢三萬三千四百文會佐史董仲宣出視令秀即劒斬之復由西南出養浩行至古跡灘請還得免而當是時諸偷聲音半似衡永人半似浙烏銃手邑中皆莫能識辨旦日出養浩移參議視右江兵巡使姜忻急使柳州倅胡中行縣具如所請乃簿責指揮使張啟賢李惟聰與巡徼驛丞徐朝欽急賢等乃提邏卒大索邑中及旁近郡也亡何梧州倅黃杞捕獲劉子連廣州捕獲趙賢曲江

獲生口三人皆有奸職亡慮二百餘金而制置使劉堯
誨大會臺御史張任御史胡宥劾奏參將倪中化等事
下御史大夫陳炯問狀炯輕重當饒養浩以上罪以請
上有詔左遷姜忻及郡守李遇春秩一等免饒養浩李
惟聰官偕徐朝欽張啟賢逮問於是主計者索諸偷旦
莫不暇休沐也

贊曰粵西既不勝搔擾之苦而奈何偷盜又復竊發乎
武宣之役操戈而入者亡慮五十餘人乃至執縣官劫

庫而奪之金豈不謂強而論之於猺獞蓋所謂鼠竊狗偷何足置齒牙間也當是時方嚴捕盜之法哉

萬歷武功錄

流賊黎福莊黃邦緣

黎福莊平樂上四屯酋長也其地故旁近樊屯通廣東大羅山互相為雄長虎踞狼吞隆慶中福莊常與男黎天龍九合諸獞大入富川略并橋及鍾用盾寨去已略霞光龍眼寨去由此福莊益慄悍亡所顧忌矣甲戌春遂與獞人韋六哥等大入鄧塘廖屋村因圍石面山執

歐孝廉乃以金錢贖得免居一二年丙子會富川割二
五圖賀縣割招賢鄉建昭平縣福莊乃窺隙約下四屯
酋長周淋湘韋方相等及大羅山流賊一千餘人直走
賀縣桂嶺邏使李廷樺提兵疾力戰斬首捕擄二十七
級餘黨還走大桐江而是時白冒與五指巖險阻可守
正德嘉靖時嘗征討弗克以故酋長盤福成專為保姦
福莊得持為羽翼無恐而昭平民屯諸偷又多有附莊
而起者矣于是擊牛酒徼惠于鬼神決筴犯府江有狀

指揮劉希武備廣運堡具以實請於府江兵使者徐作
急使指揮何伯堂行縣佯聲言將度田遂逮捕福莊復
輿膠致臺使者吳文華遂以福莊就更是日使使者何
有信持檄示天龍有如能捕韋方相韋六哥來獻得除
罪弗治不女欺也天龍竟不奉約束乃結壘土龍村糾
樊屯諸僮相扇而起兵使者厭惡天龍大怒至髮上指
冠於是移都御史及總戎李錫因使指揮童元鎮送本
旗牌而以指揮吳京行參將事乃徵向武常安福祿土

兵募遷江民兵屬守巡使陳應春沈子木彭文質吳嘉
禮調度亡何洛容荆崗北寨諸巢亦聚黨略里號村我
兵即疾力搏戰生得一人斬首三十四級餘黨遂逃常
安福祿兵追亡逐北斬首十六級我兵勇氣益百倍乘
勝擊天龍巢還攻白冒五指皆破之斬首一千三百七
十六級俘獲二百一十五口牛一百五十四頭馬四百
騎器械五百七十有八而獨天龍得逃亡賒死也其後
壬午平樂倖朱應辰以為賀縣里松等八崗有衆二千

餘人旁近楚之衡永東粵之連陽開建蒼梧之懷集山
菁幽深猺獞依阻於其中盤互連歲有司莫能擒請立
土司而以把總黎邦伯往臨之而於楚江華諸隘口則
立堡備兵五千人陳應春甚可其議因制置使郭應聘
以請以樊家中下屯及攻城江源近立土司皆有成效
故也

黃邦緣鬱林酋長也其巢旁近北海廉州合浦銅鼓諸
巢自上代為疆場患成化中大將軍常擊破之延引至

今上巳卯生齒日繁暴桀愈甚於是與北海酋長黃章
第推牛與諸偷約約五六百人並馳木頭木綿大坡羅
充金頂樟木諸村鹵略人民及畜產乘風縱火焚燒其
屋居而去去金頂也乃以所鹵獲招諸村皆欲請金錢
贖而復與城隍諸山反狼及合浦銅鼓諸偷走博白沙
田之間已大入興業諸縣城門儆戒道路不通頃之吏
目陳思聖請于兵巡使王原相而會御史顧鈐行梧州
移原相乘傳馳檄林即移書制置使劉堯誨臺御史張

任而以羽檄徵七山六雲北科連城指揮李汝賢朱綵
杜熊兆把總林燧百戶艾濟雷朝輔等提營兵及戍梧
土兵五屯旗軍四面而至而是時梧州守陸萬垓同知
魏仕吳司理蔣上欽治兵餉旦莫不暇休沐也邦緣見
漢兵強盛自度弗能當皆遂逃還故巢于是杜熊兆備
興業高智備橫州烏蠻甜菜橫石磯而諸兵日疏索鬱
林道上乃生獲躡梁善富黃四等而後知黃邦緣即覃
扶王覃扶安即覃安也先是興業鄉士大夫士庶潘大

廣十冬譚汝讓等日夜匍匐悲號於將軍所願為我盡
便計若不早殲除此屬吾等誠不得旦夕安枕也是日
周勲李汝賢軍自木根而入林燧軍自平山而入皆軍
于運塘朱綵自平山而入軍于塘甘雷朝輔魯儒自橫
嶺而入軍于石門艾濟用自跳崆而入軍於馬邨會把
總王明依計獲酋長黃邦緣軍全周顯羅扼檻車傳致
軍門屬左江兵巡使李一廸及陸川令樊祖按驗有狀
由此三軍皆跳驅以為邦緣既就擒擒它輩此譬猶口

中虱耳于是期五月十七日攻木頭城隍石礮塘表崆
崗銅鑼諸集先登卻敵破之周勲斬首捕擄四百一十
八級俘獲一百二十一人奪獲器仗六十有一牛馬六
十頭我兵亡一人傷二十八人張榜生得八十八人俘
獲一十六人招撫民狼三千八百六十人獲奪器仗三
十有九馬四匹耿四張本生得三人斬首三百三十三
級俘獲一百八十一人奪獲八人器械七十有九牛一
百四十八頭馬一十六匹我兵亡三人傷二十一人尹

邦俊生得一人斬首一百二十四級俘獲一百有一人
奪獲器械二十有八牛二十頭馬一匹我兵傷二人于
是班師而還時七月二十也居頃之廣西守巡使王厚
相李一廸侯國治以黃邦緣等捷海北兵巡使熊惟學
以黃章第等捷上幕府斬首捕擄凡五千一百五十六
人以請事下大司馬方逢時具如所奏于是賜劉堯誨
張任金三十兩表裏二王原相等金二十兩李汝賢等
金十五兩陸萬垓等金十兩

贊曰法曰神乎神乎至於無形鬱林興業之間旁近海
北諸賊乘虛而出則人不知其所守乃飽飫而歸則兵
又不知其所攻此豈非無形之險哉且鬱林之捷衿甲
面縛而請者以千數安可保不為它人之黎福莊黃邦
緣乎此非獨其勢然蓋非我族類其心必異乃自古記
之矣

萬歷武功錄

叛兵呂子和張鳳梁一貴

呂子和岑溪裨將也先是協總金仲恩與佐史唐祐妻

通而會公館傾頽縣令葉詩使祐繕治之祐攜雞往公館行至館門雞散走祐追亡館所仲恩與祐妻方坐公案上相嚮飲醇酒大自笑樂也仲恩見事泄畏祐遂乘醉執祐祐大聲聲言殺人得解是夜思命庖人擊鮮約學博張講飲飲至夜半講惡縣官不給民兵治乘輿乃為恩謀使兵衆先擊之旦日出果與把總張之賢使哨官吕子和陳泗集戍卒百餘人擁大蓋策駟馬直走縣門鼓噪聲欲殺唐祐而班頭賴清解釋之頃縣尉楊

璽請于分守使王原相參將王德懋而縣令亦移制置使凌雲翼矣事下分守使乃使百戶王廷棟逮王德懋張之賢金仲恩廷棟既到縣即使使者大索諸戍卒一切皆案治之諸戍卒皆惶懼恐染于事于是呂子和復聚衆走縣門欲殺令令遂逃楊璽即與司庫以庫金埋伏後園躬提兵鏖諸兵得保縣令家室我兵生獲陳鳳等六人餘黨皆奔走過南渡水口而去分守使急使百戶艾濟用安撫以羽檄徵戍梧狼兵及七山李汝賢北

科劉朝棟連城朱綵六雲杜熊諸指揮兵往擊之朝棟
斬首六級生獲十一人李汝賢斬首四級生獲八人朱
綵斬首六級生獲十一人是時縣道皆備兵兵衛甚設
北流生得五人廣容斬呂子和等首二級我兵乘勝勇
氣益百倍追逐至潯州斬首四級生獲四十三人皆繫
梧州獄復鼓行行至貴縣石塘村諸戍卒度勢不能敵
皆負弩矢羅列于道左望見德懋單騎諸戍卒盡叩頭
具言將軍幸寬假吾等死唯將軍所左右由此許諾得

贖罪畢屯北地矣是時戊寅冬也雲翼乃案王德懋等
罪以請而給諫光懋亦上書劾奏大意欲重治失事諸
官將以風邊吏于是大司馬方逢時案諸疏覆請上有
詔免葉詩官張之賢等下御史逮問貶李豫秩一等奪
王原相俸半載諸脇從亦由此得除罪相與滌盪前過
曰唯將軍所欲用之雖赴水火猶可也

張鳳平樂戍卒也常為寇東粵事覺亡抵于把總黃恭
由此得為蒼頭軍備府江先是制置使郭應聘破府江

諸徭請置土吏于是上中崗則屬名色把總齊凱下崗則屬土吏凱領田凡一萬三千八百八十九頃得招致敢死士為兵矣故事平樂營兵三百五十人人給餉月八錢壬午冬參政使陳應春請裁為六錢鳳習和東粵故八錢也乃與張元王鸞等謀曰何不俱赴縣官請增餉由此出死罪囚略縣庫遂走東粵可乎元等唯唯於是擊牛酒為盟是日即立張鳳為都總張元為頭總王鸞為二總梁朝為三總何明為四總江大為五總范惟

芝為主謀張學為紀室張學伍等一百三十人為長幹
直走城中鼓噪欲增餉殺黃福賢等一十三人傷輅守
堯等三十六人縱火燒民居奪驛騎馬四十餘匹財產
亡算會齊凱詣府而備兵使葉朝暘急使守備使武應
龍同凱往諭之遂隨凱入洞旦日日中渡江竟執鄉大
夫王佩瑤而去是時縣當給軍餉凡三百金平樂乃出
帑金凡一百五十兩副把總黃恭給軍而司庫唐天選
罹霜露病甚餘餉埃異日頃總戎呼良朋提標兵土兵

馳縣平樂營之衆以叛而去者固二百六十餘矣齊凱
乃釋佩瑤傳馬貴陳子鳳首因復輿膠致張學伍李貴
等請贖死總戎知貴等皆非渠魁弗從鳳凱帥其衆走
荔浦城下欲攻戰會參將白玉提永寧兵至而土舍覃
文奎兵亦起鳳等見我兵五合六聚衆弗敵乃以凱家
室閼匿于隘中先以數十人衝鋒白玉即斬其衝鋒者
二人以徇諸叛兵皆股栗頃諸叛兵復盡出其衆殊死
戰乃以鳴鏑射我軍我裨將江惟中等二十餘人中流

矢幾死于是諸軍大戰數合擊破之斬首二百有六級
生獲葉子明張鳳齊凱等二十二人弓矢鎗刀旗幟諸
什物亡算是夜凱自縊死於是制置使吳文華簿責黃
參及平樂守周圻等以請上請太守支放後期致激衆
倡亂傷命數多遣執金吾逮問周圻問狀是時甲申秋
八月也給諫王三餘亦上書劾奏葉朝暘復謂以營兵
之故而罪及上官恐長諸軍驕悍請以朝暘戴罪視事
上可之亡何周圻以檻車至長安詔鎮撫使郎訊既得

其狀以聞上謂圻文詞抵飾詔所司以重罪論居頃之
給諫陳壁上書言致圻於重法非所以肅反側子之心
而振國威也而給諫鍾于淳猶慮府江去蒼梧可五百
里其間山高林茂為兩粵咽喉而府江又南岸之逋逃
藪譬兩岸則門戶而三崗則堂奧也先是上有詔詔大
司馬張學顏曰近來各處募兵多係無籍投充各該管
軍官貪縱撫馭失策以致釀患啟釁貽害地方于是上
書言齊凱既伏誅淳意欲三崗或易以把總或易以土

更比筴以決而營兵則莫若練土著稍稍厚其廩餼以招致之張希皋奏亦此意事下戎部始征蠻將軍居梧州控制兩粵後盜賊鼎沸復以總戎一人居粵西頃周圻請于鎮撫使曰水東賀縣與大羅山相連張鳳先欲略水東因從大羅山走東粵皆有狀由此觀之兩粵兵防誠不可不嚴也

梁一貴梧州大崗戍卒也崗故有左右營控制諸徭先是參將吳紳到官管事即欲部署諸戍卒乃治鄣鎗竹

蕪因與諸戍卒期以二十八日閱諸軍操曰敢議令及
不如令者請論如軍法時丁亥四月二十也居七八日
紳果登大將軍壇鳴金鼓閱操屬哨官梁鳳傳令會鳳
新視事不閑于軍法失儀紳大怒命左右榜掠之二十
已命縛致戲下于是梁一貴胡一倫等帥右營兵三百
餘人直走入紳所鼓噪將竹蕪毀折之負鳳出圍紳復
大言曰吾等盡下班若烏奈我何紳不得已疆為好言
慰藉諸戍卒諸戍卒始出是時來經濟為蒼梧兵巡使

急使指揮李汝賢曉譬得安堵於是逮捕梁鳳羅本錢
子和及叛兵梁一貴胡一倫黃珠蒙惠楊明繫梧州獄
即請于制置使吳文華及臺御史吳善御史蔡系周皆
後先上書議調吳紳而以渠魁梁一貴等罪當死會大
司馬王一鶚議亦如之上乃詔曰營軍欺蔑本管故違
軍令驕悍成風大壞紀綱乃以梁一貴等五人梟斬蒼
梧市其後制置使劉繼文如詔行先是上有詔欲重治
吳紳而給諫吳之佳上書大略以為南兵吳公泰之變

上幸動一副將諸軍圍視而起今又治一參將則是軍士挺臂一呼將軍挽首輒去所謂一脛之大幾如腰一指之大幾如股此賈誼常至痛哭流涕者也

贊曰善哉乎吳給諫練土兵優家丁諸筴也而給諫常自言曰招兵易散兵難散土兵易散客兵尤難之難顧第老弱有汰逃亡勿補每一決即以土著敢死士補之亦自足土著事夫土著何敢叛亂哉易曰履霜堅冰戒其漸也童牛之牯嚴其微也且岑溪之變平樂之變大

尚之變此豈獨將過蓋亦諸軍漸驕悍使然哉

萬歷武功錄

五山

貴縣五山界于賓來遷武間背倚龍山即所稱藤峽右臂也山崇而袤為八寨逋逃淵藪向事招徠乍服乍叛左江持之急則遁而右右江持之急則匿而左橫剽四出民不寧居萬歷二十三年參將白斯清潛議鵬剿而機事不密幾釀大禍督撫二臣檄副使楊寅秋等以計破之餘黨相率請降窮山負谷舉為編戶矣撫臣陳大

科會督臣採衆議條其善後事以聞一移置將領以重
彈壓一調撥所軍以實重堡一棊布營兵以聯聲援上
如議施行

通志

誅陸佑韋達禮

陸佑黃尚俱思明頭目時知府黃應雷孱懦不振佑尚
專政會思陵知州韋紹曾不善撫御其衆衆多怨之韋
光縉欲奪其職周佑為紹曾掌記嘗以姦淫事為紹曾
所逮及其子保俱收繫欲置之法佑素結交祿州夷官

韋達禮而陸佑亦拜達禮稱為乾兒先是佑尚圖植光
縉佯約達禮互市故負其牛畜價揚言事由思陵欲激
怒達禮周佑父子亦陰附光縉至是密投達禮佑尚為
之慙逋達禮惑於騙牛之說方欲釋憾思陵遂統兵衆
萬餘直擣思陵攻擁入州就獄中釋周佑父子擄紹曾
及印大掠人口財畜而去以紹曾愛妾葡萄賜周佑陸
佑乘紹曾被執遂與黃尚發兵納光縉思陵稱為新主
已而達禮知其謀悔為所賣亟送紹曾及印歸陸佑嗾

州民告逐紹曾又嘗以舊事憾張同知乃集目兵為亂
闖入官衙趕殺斫傷衙衆無數周佑既歸達禮而故習
交州事知黎莫爭長未定遂諛達禮有奇相且曰不黎
不莫可收鷸蚌之功教令屯兵儲糧據險結寨達禮從
其計因假稱內附誣交南耆目逆篡冀絕貢道以圖舉
事督府聞之大駭以其事聞責鄭松令擒達禮周佑責
黃應雷令擒陸佑等調江州等州官兵壓思明境上以
待鄭松得檄即遣其子鄭杻統兵衆疾馳入祿州擒達

禮達禮聞之先期逸去止獲佑保等以夾板公文從便
道獻官兵既入思明境至風門嶺應雷亦獲黃尚出獻
陸佑阻兵抗命遂逐應雷而奪其印率衆與官兵拒戰
官兵失利乃浚城堅壘時出劫鹵鄰州財物招集兵衆
左江大震於是議調集東西兩省漢土兵分四道並進
賊出戰不能敵遂大敗佑自刎死獲其子宋等歸達禮
之邇也依蠻莫以居久之官兵既罷去揣知交人不急
已乃潛回舊穴招兵聚衆據險自固會黎維新請襲乞

都統印督府因令人詰責鄭松縱惡令必相機擒捕達
禮方允其請松慮維新不得封乃畫策授計密令其弟
韋德慶以間刺殺達禮函其首獻之於是維新受封領
印如故事方陸佑拒命時達禮獲農儂等密帶佑求助
安南一書來獻內云天朝思明府掌兵頭目陸真謹肅
書奉南平安王殿下云達禮以佑逐紹曾惡之故獻
此書正欲問安南爾佑么麼叛目安南助之何故不知
佑於安南交契何如而望平安之助其逆也初讞疑其

非真良自有見惜諸帶書人未得其情而駢死箠楚之下耳書內有云暫遣兒曹將四寨雄兵相敵各兵已散再限四五月內大調兩江兵臨攻此理必虛但用銀贖罪而已又云其事亦不為小不下一萬銀費願恤難中加助一二此為何等語也可發一笑

西事
珥

擒都該


潘都該者殘莫之黨因戰敗無所附聚衆行劫海上先是上思有故順州知州林瑞芝罷官歸素貪狡多橫暴

把持州事村民農光等祖田為豪所奪官判歸學瑞芝以家人名承佃收粒自肥仍壓令光等服役衆拒不從遂誣光等叛亂私執送繫州獄挾州官申請臬之以令衆會光夜挖牆越獄遁去瑞芝復誣稱羣賊二百餘人踰城入攻獄劫取農光捕官亦欲自脫遂以劫聞請加征勦已又乘州官公出假稱上司檄調部兵誅賊擅使其黨黃道顯林仙境統衆劫殺共口答斗諸村掠其財畜及殺死六十餘人光等憤懼不能自申遂走海上勾

引都該賊衆共為嚮導突入上思境內大肆劫掠初達禮既被刺殺而遷隆故負馬價德慶向兆基索取兆基無意償之佯曰汝境方多事不如以遷隆為外府德慶信之已而更授馬價屬令多市好馬兆基復受之俱不予馬德慶恚怒甚遣其酋韋福才等統兵攻遷隆馱丘等村鹵其人畜財物以去事在三十四年正月次年三月復統兵來遷隆境內屯往鹵劫蘭馬等村遷隆與上思壤相錯正與都該之事會遂疑傳德慶夷兵連犯上

思兵使者聞之調集土漢官兵申討都該逃去督府移檄切責安南令擒獻德慶德慶自明犯上思者乃都該願截擒自效已而德慶攻都該取回女口十六牛畜七十餘以獻已又獻出兩歲所鹵馱丘蘭馬等村人口當事以牛酒勞其悔過且責必生擒都該方許自贖德慶密結都該妹夫該晏為內應佯屬都該代鬻賊魚給兵食使人肩空籬往受魚因藏兵散處居停舍內俟其出內外夾攻遂擒都該以獻梟斬之

西事
珥



粵西叢載卷三十